

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- प्रधानमंत्री नरेन्द्र मोदी होर अज्ज दिनै 11 बजे अपने रेडियो कार्यक्रम मन की बात दे राहें देश-बदेश दे लोकें कन्नै बचार सांझे करडन।
- केन्द्री राज्यमंत्री रामदास अठावले होरें आखेआ ऐ जे जम्मू-कश्मीर गी तौले गै राज्य दा दर्जा थोने दी मेद ऐ। उ'नें आखेआ ऐ जे केन्द्र सरकार जम्मू-कश्मीर दे लोकें गी न्यास उपलब्ध करोआने लेई वचनबद्ध ऐ।
- लेफ्टिनेंट गवर्नर मनोज सिन्हा होरें कल श्रीनगर च इंटरनेशनल बुद्धा पीस अवार्ड ते भारत रत्न डाक्टर भीम राव अम्बेडकर अवार्ड हासल करने आहलें गी सम्मानित कीता।
- मुखमंत्री ओमर अब्दुल्ला होरें जम्मू-श्रीनगर राश्ट्री जरनैली सिड़कै दी मरम्मतती ते ब्हाली सरबन्धी जतनें दा जायजा लैता। उ'नें घाटी सने होरनें दूर-दरेडे इलाकें तोहड़ी जरूरी चीजें-बस्तें दी सप्लाई जकीनी बनाने लेई बी आखेआ ऐ।
- जम्मू-कश्मीर पुलसै आतंकवाद कन्नै जुड़े दे बक्ख-बक्ख मामलें च पुंछ च आतंकवादिएं लेई कम्म करने आहले इक बदनाम अपराधी दी संपत्ति गी अटैच कीता ऐ।

PM-MKB

प्रधानमंत्री नरेन्द्र मोदी होर अज्ज दिनै 11 बजे अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्नै अपने बचार सांझे करडन। एह इस कार्यक्रम दी 125मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज ऑन ए.आई.आर मोबाइल ऐप ते डीडी न्यूज, आकाशवाणी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ। आकाशवाणी जम्मू दे प्रादेशिक समाचार एकांश आसेआ अज्ज रातीं सांझे 10 बजे मन की बात पर इक बशेश परिचर्चा बी प्रसारत कीती जाहग जेहदे च सांझे परोहने होडन जम्मू-कश्मीर स्कूली शिक्षा बोर्ड दे डरेक्टर एकैडमिक्स प्रोफेसर सुधीर सिंह ते उंदे कन्नै गल्लबात करडन साढ़ी न्यूज एन्कर श्रुति खजूरिया।

Athawale-Statehood

केंद्री मंत्री रामदास अठावले होरें भरोसा जताया ऐ जे जम्मू-कश्मीर तौले गै अपना राज्य दा दर्जा परतियै हासल करी लैग। श्रीनगर च इक पुरस्कार समारोह च हिस्सा लैने परैंत मीडिया कन्नै गल्लबात करदे होई उनें आखेआ जे राज्य दे दर्जे दी बहाली दी मंग बधा'रदी ऐ। उनें आखेआ जे लगदा ऐ जे तौले गै राज्य दा दर्जा बहाल होग। अठावले होरें आखेआ जे भारत सरकार जम्मू-कश्मीर दे लोकें गी न्यास प्रदान करने आस्तै बचने-बज्झी दी ऐ। उनें दफा 370

गी हटाए जाने दे परैंत केंद्री गृह मंत्री अमित शाह हुंदे आश्वासन दा बी जिक्र कीता जेदे च राज्य दा दर्जा बापस करने च वायदा कीता गेआ हा। अपने संबोधन दरान उनें आखेआ।

<><><><><><>

LG-Awards (byte)

लेफ्टिनेंट गवर्नर मनोज सिन्हा होरें आखेआ ऐ जे असल जीवन, होरनें दे कल्याण लेई निस्वार्थ सेवा कन्नै कम्म करने आहलें दा गै हुंदा ऐ। एलजी होरें एह गल्ल कल श्रीनगर च इंटरनेशनल बुद्धा पीस अवार्डस ते भारत रत्न डाक्टर भीम राव अम्बेडकर अवार्ड हासल करने आहलें गी सम्मानित करदे होई आखी। इस मौके पर श्री सिन्हा होरें बसनीके गी गुजारिश कीती जे ओह भारत दी सगोसार सांस्कृतिक विरासत दा जश्न मनाने दे कन्नो-कन्नी बरोबरी ते सम्बोध पर आधारित समाज दे निर्माण लेई अपना जोगदान बी देन। उनें आखेआ

एलजी होरें जम्मू-कश्मीर च कुदरती क्रोपिएं करी जान मुहाने आहलें गी श्रद्धांजलि दिंदे होई प्रभावत परोआरें गी हर मुमकन मदाद दा भरोसा बी दोआया।

<><><><><><>

Export-GDP

आर्थिक विशेषज्ञें चालू माली बरे दी अप्रैल-जून तिमाही च भारत दे सकल घरेलू उत्पाद-जीडीपी दी वृद्धि दर 7 अशारिया 8 फीसद रौहने दी सराहना कीती ते आखेआ जे अर्थ बवस्था सारी मेदें थवां बेहतर ऐ। इस बारै गल्ल करदे होई अर्थ शास्त्री सिद्धार्थ कलहंस होरें आखेआ जे भारत अर्थ बवस्था आसेआ कीता गेदा प्रदर्शन मेदें कोला मता ऐ ते एह निरंतरता

दा प्रदर्शन करदा ऐ। उनें आखेआ जे एह इक सकारात्मक प्रवृत्ति आहली बकखी इशारा करदा ऐ। आकाशवाणी कन्ने गल्ल करदे होई उनें दस्सेआ।

<><><><><><>

Rana-Water

जम्मू च हाईं दी मारै हेठ आए दे इलाकें च जरूरी सेवाएं दी दस्तयाबी जकीनी बनाने लेई मती सक्रियता कन्ने गैह पुट्टदे होई जल शक्ति मंत्री जावेद अहमद राणा होरें सरबंधत विधायकें ते जिला अधिकारिएं कन्ने इक उच्ची सतह दी जायजा बैठक लाई। इस बैठक दा मुंडला मकसद, बुरी चाल्ली प्रभावत होई दी पानी सप्लाई आहली सेवाएं गी परतियै ब्हाल करना हा। इस मौके पर मंत्री होरें दूर-दरेडे ते पच्छेत्रे इलाकें च पानी सप्लाई जकीनी बनाने लेई फौरी तौर पर पानी दे टैंकरें गी कम्मै पर लाने दे हुकम जारी कीते। राणा होरें लोकें गी जकीन दोआया ऐ जे हालात सामान्य बनाने ते हाईं दी मारै हेठ आए दे इलाकें च पानी दी निविघ्न सप्लाई जकीनी बनाने लेई सब्भै मुमकन जतन कीते जा करदे न।

<><><><><><>

CM-Highways Meet

मुख्यमंत्री ओमर अब्दुल्ला होरें हाल दिएं बरखें करी जम्मू-श्रीनगर राश्ट्री जरनैली सिड़क - एनएच 44 ते होरनें राश्ट्री जरनैली सिड़कें सनें बड़डिएं सिड़कें गी पुज्जे दे नुक्सान दा कल इक बैठका दरान जायजा लैता। इस मौके पर उ'नें सरबंधत अधिकारिएं गी निर्देश दिते जे ओह सिड़कें दी मरम्मती ते उ'नें गी परतियै ब्हाल करने सने, गड़डिएं दी आओजाई ते खास तौरा पर

कश्मीर घाटी ते होरनें दूर-दरेडे इलाकें च जरूरी चीजें-बस्तें दी सप्लाई जकीनी बनाने लेई तेजिआ कन्नै कम्में गी तोढ़ चाढ़न। मुखमंत्रि होरें लोकें दिएं जरूरतें गी पूरा करने लेई बक्ख-बक्ख मैहकमें गी आपूं-चै तालमेल बनाइयै कम्म करने दे बी निर्देश जारी कीते।

<><><><><><>

Traffic

तोआई जम्मू-श्रीनगर राश्ट्री जरनैली सिड़कें पर गड़डिं दी आओजाई आंशिक तौरा पर ब्हाल होई गेई ऐ ते सब्भनें शा पैहले बता फसी दिएं गड़डिं गी गै अगगे बधाया जा'रदा ऐ। थरड़ पुलै दे नेड़े सिड़कें दा इक हिस्सा धस्सी गोआ ऐ जिस करी जखैनी उधमपुर थमां श्रीनगर बक्खी अज्ज गड़डिं गी अगगे बधने दी खुल्ल नेई दिती जा'रदी। एहदे अलावा गड़डिं गी अज्ज नगराटा थमां रियासी, चनैनी, पत्नीटाँप, डोडा, रामबन, बनिहाल ते श्रीनगर बक्खी जाने दी इजाजत बी नेई होग। कटरा ते उधमपुर दे बसनीकें गी आखेआ गोआ ऐ जे ओह् निर्विघ्न ढंगगै'नै आओजाई जकीनी बनाने लेई अपना फोटू लगगे दा शिनाख्ती कार्ड अपने कन्नै रक्खन।

<><><><><><>

Weather

मौसम विभाग नै अज्ज जम्मू खिते दे बक्ख-बक्ख हिस्सें च दरम्याने दर्जे थमां भारी बरखा बरने दी पेशगोई कीती ऐ। मौसम विभाग दे डरैक्टर डाक्टर मुख्तार होरें दस्सेआ ऐ जे अज्ज दिनै 11 बजे तगर जम्मू, कठुआ, रजौरी, रियासी, डोडा, रामबन, किशतवाड़, सांबा ते उधमपुर च भारी बरखा बरने दे असार न। मौसम विभाग नै इस दरान बदल फटने, चानचक्क हाड़

औने ते ल्हास-पस्सियां पौने दी चेतावनी जारी करदे होई बसनीकें गी गुजारिश कीती ऐ जे ओह सोहगे-सतर्क रौहन ते कुसै बी एमरजेन्सी दी सूरतें च 112 नम्बरै पर राबता करन।

<><><><><><>

Poonch-Property

इक महत्वपूर्ण कार्रवाई दे तैहत जम्मू-कश्मीर पुलिस, पुंछ जिले दे मंडी इलाके च हिज़बुल मुजाहिद्दीन आतंकवादी गुट दे हैंडलर ते भगौड़े बदनाम अपराधी मोहम्मद अज़म दी अचल संपत्ति गी अटैच कीता ऐ। अदालतें दे हुकमै परैन्त पुलिस आसेआ एह कार्रवाई कीती गेई ऐ। सुरक्षाबलें गी आतंकवाद कन्नै जुड़े दे केई सारे मामलें च अज़म दी तलाश ऐ ते ओह बन्ना टप्पियै पाकिस्तानी दे नजैज़ कब्जे आहले जम्मू-कश्मीर दे इलाके च नस्सी गेदा ऐ। पुलिस दी इस कार्रवाई गी आतंकवाद दे खलाफ इक बड़्डी गैह दे तौर पर दिक्खेआ जा'रदा ऐ।

<><><><><><>